

Roegguq, Roegguq, Mwngz Vaiq Mbin

Ngoenzneix cuengqahag ma ranz, daxboh lwnh gou, de youq ndaw gunghyenz gip ndaej duz roegguq ndeu.

Daxboh vix hawj gou yawj, gou yawjraen miz duz roegguq ndeu deng lamh youq yangzdaiz. De gwnz ndang lumj daenj geu buhvaq mong ndeu, hoz lumj gyok gaiq sujbaq ndaem hau doxgek ndeu dem. De yawj daeuj lau dangqmaz, song ga saenz-gywggywg. Gou gaenjgip ndingq boi raemx ndeu hawj de gwn, hoeng de deihdeih doiqlaeng, mbouj gwn. Gou youh vanq gaem haeuxsan ndeu youq baihnaj de, de yawj cungj mbouj yawj. Doeklaeng gou youh ra daeuj bonj sawgojgaeq ndeu gangj gojgaeq hawj de nyi, de ngiengx gyaeuj yawj gou, yaep da gubgub……

Mwhneix, gou dingqnyi daxboh doiq daxmeh naeuz: “Dahlwg ndang nyieg, raeuz gaj duz roegguq neix aeq dang hawj de boujbouj ndang ba……” Dai lo! Duzroegguq miz nanh, gou vaiq siengj banhfap gouq de!

Gou caeg gej ok diuz cag lamh ga roegguq haenx, umj de ma daengz bak cueng, youq ndaw sim doiq de naeuz: “Roegguq, roegguq, mwngz vaiq mbin.” Roegguq ndwn youq gwnz cueng nyeux yawj gou, lumj dwg doiq gou naeuz “gyo’mbaiq”. Gou yiengq de vad fwngz, de dopdop fwed, bongh mbin bae gyae lo.

Yienznaeuz gou mbouj ndaej gwn dang roegguq, hoeng raen duz roegguq ndaej swyouz, ndawsim gou angq raixcaix!

(Cangh Yinhyij raiz. Ouh Caijfangh hoiz)



Duzbeih

Gyangdoengh fawhndat, gizgiz cungj miz duzbeih mbin bae mbin dauq.

Mwh caengz doekfwn, gwnzbuenz baihnaj ranz, miz baenz boengj baenz boengj duzbeih mbin bae mbin dauq. Duz-beihnding, duzbeihhenj, duzbeih’o, aj fwed ronghcingh, mbin daemqdetdet baebae dauqdauq, gou yawj ndaej da mbouj yaep bae.

Daxboh senq naeuz gvaq, duzbeih dwg duzndei. Yienghneix, gou couh gyaez duzbeih raixcaix.

Ngeix mbouj daengz, gou laegfwnggh couh raen duzbeih dwghaemz lailai bae.

Gou daj baihrog guhcaemz dauqma, hozndat dwk hongz naeuz: “Boh ha, mwngz yaeuhvunz! Duzbeih dwg duzyak duzrwix, boh vihmaz naeuz duzbeih dwg duzndei ne?”

Daxboh raen geizheih couh naeuz: “Guhmaz le?”

“Haxbaenh, gou yawjraen, duzbeih hung ndaemheu ndeu, gaebdawz duzbeih iq ndeu gwn bae.”

“O! Boh mbouj ngeix lo, haxbaenh gangj ndaej mbouj liuxcaez, miz cungj duzbeih hung ndaem ndeu, mbouj gag gwn duzbeih iq ndwi, lij goj gaeb gwn doenghgij duzbeih hung nding, duzbeih hung henj daeuj gwn dem. Youq biengz raeuz, boh seiziq heuh de guh ‘duzbeihguk’”. Daxboh naeuz: “Duzbeih wngq mbouj gaeb duzbeih iq ne, gag duzbeih hung ndaemheu de cij yak baenzneix, ngahgwn baenzneix go.”

“Hw! Duz yakrwix neix, gwn lwg swheij dem. Boh ha, mwngz baenzlawz mbouj lwnh gou rox gonq ne? Gou vanzlij naeuz de dwggyaez dahraix bw!” Gou sim mbouj angq, aenvih daxboh mbouj lwnh liuxcaez bae, neix gou gaxgonq gyaezmaij gvaq duzbeih hung ndaemheu de, seizneix cingq haemz de dangqmaz bae.

Daxboh naeuz dem: “Aenvih gwn duzbeih iq le, duzbeih hung de couh bienq ndaej heu baenzneix ndaem baenzneix lo, mwngz yawj de yakyawj baenzneix! Doenghgij duzbeihhenj duzbeihnding mbouj gwn duzbeih iq de, ndei yawj baenzneix!”

“Dahraix ha?” Gou angqfaengz lai.

(Daj 《Bonjsei Sim Lwngnyez》 (Veiz Gizlinz raiz) senj okdaeuj, Lwgfwngzme/卢奋长 hoiz)

Duzdouq “Lingzlungz” Dwgggyaez

Miz mboengq ndeu, gou daegbied gyaezmaij duzdouq iq, couh laemxsim gouz bae gouz dauq, heuh daxmeh gou cawx duz ndeu. Daxmeh euq mbouj ndaej, deng cawx duz ndeu hawj gou.

Miz ngoenz ndeu daxmeh dauqma seiz, gou youq gyae couh raen de ndaw fwngz riuj aen roengq ndeu, ndaw roengq miz duzdouq hau diuqyekyek ndeu. Gou sikhaek buet gvaqbae, gwnzgwngz lajlaj yawj bae yawj dauq: De hau lumj nae, lumjnaeuz beij nae lij hau, rwz raez-rangrang danhseih rieng dinjdetdet, langhnaeuz mwngz mbouj yawj sijsaeq ne couh yawj mbouj raen dahraix. De miz giz cei q daegbied dwg lwgda de, lwgda de hoengzhwdhwd bae, lumj song naed majnauj hoengz luemjmabmab. Aenvih de ngamq biek cij, youh iquetet yiengh dwgggyaez dangqmaz, ndigah gou heuh de guh “Lingzlungz”. Miz de le, ranz dou lai miz haujlai yinxdaeuz lo.

Langh gangj gij sibgvenq saedceij de, duzdouq neix cingq caeuq duzmou doxlumj caez, ngoenzngoenz gwn liux

youh gwn dem. De gwn doenghyiengh seiz, gij yiengh de caen sawj vunz riu mbouj ndaej, daej mbouj baenz, raen miz doenghyiengh soengq daengz le couh youq ndaw roengq buet geij baez gonq, yawj le caen mbouj miz vunz couh gaemz hung gwn ndaej vannaeknoek bae. Langhnaeuz mwngz nyauz de, de couh caengz fouq lwgda coh mwngz, hawj mwngz simvueng bae. Langhnaeuz mwngz hawj gijgwn hawj de noix, de couh youq ndaw roengq buet bae buet dauq mbouj dingz mbouj duenh, hawj mwngz sim mbouj ndaej caem. Baez youq seiz neix gou couh ndaw sim gag nauhbodbod: Lingzlungz ha Lingzlungz, ndaek cojcoeng iq gou, gou ngoenzngoenz hawj mwngz gwn ndei youq ndei, mwngz lij youq giz haenx nyauz bae nyauz dauq, mwngz yaek guh maz ne?

Couh aenvih de maj gwn gyaez ning, lij miz gienh saeh ndeiri ndeu: Ngoenz haenx, gou dawz gijgwn banhaemh duh Lingzlungz coq haeuj ndaw roengq le, couh bae ninz lo. Byonghwnz ndiu le couh dingqnyi gwnz yangzdaiz miz ningdoengh, couh guhmuengz ngauz ndiu daxmeh caeuq daxboh, gyoengqde hix dingqnyi gwnz yangzdaiz miz ningdoengh lo, lau miz bouxcaeg, couh guhmuengz buet daengz yangzdaiz, hai daeng, hat sing hung ndeu: “Lwgcaeg mwngz, buet haeuj lawz bae?” Danhseih baez yawj, mbouj miz maz bouxcaeg, cij dwg Lingz-lungz youq ndaw roengq buetbuet diuq-diuq. Yienghneix Lingzlungz deng doek-saet lo, lwgda dinghdingh cim baenaj youq. Dou daengx ranz vunz cungj riu hwnjdaeuj lo.

Mwngz yawj neix couhdwg duzdouq iq Lingzlungz, yienznaeuz de ak gwn, hoeng dou daengx ranz vunz cungj gyaezmaij de.

(Luz Swhcinz)

